

КАЗКИ



Богач

ДЛЯ МАЛЫХ ДЕТЕЙ.

БОГАТЫЙ МАРКО.

КАЗКИ ДЛЯ МАЛЫХ ДѢТЕЙ.

БОГАТЫЙ МАРКО.



УЖГОРОД 1922.

Выдавництво тов. Просвѣта в Ужгородѣ.

Státní tiskárna v Užhorodě 1922-1951.

БОГАТИЙ МАРКО



Богинин

Богатый Марко хотѣвъ усѣхъ запросити до себе у гостину. Просить
и Бога, чтобы Бог прийшов до него у гостину.

Поѣхавъ богатый Марко на ярмарокъ, накупивъ сукна, выставивъ дорогу и поставивъ вартовниковъ, абы никто не ѣздивъ по сукнѣ. Стоить варта, а туй идуть три старцѣ. А то не старцѣ были а сам Бог, а с ним два ангелы. Вартовники кричать :

— Не идѣть сюды! По сукнѣ буде ити сам Бог до богатого Марка в гостѣ!

— Пустѣть, люде добри, — каже Бог — мы не будем ити по сукнѣ, мы сукно будем одгортати.

Варта их пропустила и они пошли собѣ. Идуть, тай идуть, онъ захопила их нѣч. Зайшли они до богатого Марка проситися на нѣч. Богатый Марко не пускае и каже :

У мене теперь богато гостей буде, де я вам дам мѣсце. Идѣть собѣ до кого иншого. У мене сьогоня и без того буде повно людей.

— Та нам, — каже Бог, красного мѣсця не треба, нам абы яке. Мы тѣлько переночуеме.

Довго богатый Марко не пускав, а потѣм позвавъ сестру и каже :
Заведи их тулы, де куры живутъ. Нехай там переночують, коли не хочуть ити до иншого господаря.

А сестра повела их у пекарню, дала им на вечерю кусок хлѣба и каже :

Повечеряйте люде добри, тай лягайте спати, де кто захоче, а я пойдю гостей приимати.

И пошла. Пошла она з хаты, але не до комнаты але стала под окном и дивитьсѣ крозь окно, что тотѣ старцѣ будутъ робити.

Сидятъ они на лавѣ и вечераютъ, коли прилѣтае два ангелы и ка-
жутъ Богови :



— Господи! народилася дѣтина, яку їй долю дати? А Бог каже:

— Богатого Марка маетком най запануе!

Побѣгла сестра до брата и каже ему:

— То не старцѣ, то Бог. Я видѣла, як до него прилетѣли два ангелы и звѣдали, яку долю дати той дѣтинѣ, что народилася. А Бог сказав: „Богатого Марка маетком най запануе“.

На другій день Марко поѣхав глядати тоту дѣтину. Їздив, їздив, весь край зѣздив — не найшов дѣтины. Не скоро то он дознався, что тота дѣтинка живе в иншом краю. Поѣхав туды, купив ту дѣтинку за пятьсот золотых, вывѣз на дорогу, кинув на снѣгу а сам поѣхав до дому.

Лежить та дѣтинка на пути, коло неѣ горить воскова свѣчка и два ангелы ю забавляють, обы не плакала.

Їде дванацять купцѣв до богатого Марка кожу купувати.

Їдуть они, їдуть, онѣ лежить на пути дѣтина.

— Возьмѣм ю!

— Возьмѣм!

От взяли ту дѣтину и поѣхали. Приѣздить они до богатого Марка и хваляться ему:

— В таком-то — кажутъ — и таком мѣстѣ, на пути нашли мы таку то и таку дѣтину.

Марко, як почув, напудився так, что онѣ умлѣв. Як подужав знов, пошов шукати дѣтину. Найшов он ту дѣтину знов, купив за шѣсть сот золотых и казав зробити таку бочку, абы вода не затѣкала. Зробили ту бочку, положили в середину дѣтину и пустили на море. Плавала та бочка по водѣ може за три дни, або и бѣльше, поки ю вѣтер пригнав до берега. А там бабы хустя прали.

Як побачили они бочку, думали, что то мука плыве. Кажуть, треба бы ю зловити.

Почула дѣтина, что люде говорятъ, оперлася ногами, выдусила дно, вода ю выкинула на берег а бабы ю имили.

Дойшла чутка до богатого Марка, что ту дѣтинку вода выкинула на берег, а бабы ю поймали и взяли за свою дѣтину. Журиться он знову. Что туй робити? Нѣяк не можно звести зо свѣта дѣтинку. Сидѣв он, думав, думав, а далѣ надумався и каже :

— У мого зятя суть злѣ собаки. Поѣду, ще раз куплю ту дѣтинку и напишу до зятя, обы напустив на ню собак. Они розорвуть ю.

Поѣхав он, купив сю дѣтинку за сѣм сот золотых, привѣз до дому, написав до зятя лист и послав тым хлопцем. Он уже вырѣс такий здоровый, хоть зараз женитися.

Пѣшов тот хлопець з листом до зятя богатого Марка. Иде тай иде, — аж тут на пути стоить дѣд.

А то був сам Господь Бог.

— Здоров, хлопче !

— Здорови, дѣду !

— Куды ты, хлопче идеш ? — звѣдає дѣд.

— Иду до зятя богатого Марка, письмо несу.

— Дай каже дѣд — я прочитаю, что там богатый Марко пише.

— Не дам. Менѣ богатый Марко заборонив, абы я нѣкому не давав читати.

— Ну, коли ты вже не даеш прочитати, то дай хоч подивитися.

— Подивитися мож, но подивися !

И дав дѣдови в руки той лист. А Бог узав, та вымазав то мѣсце де было написане, обы того хлопча розорвали собаки а написав, обы его зять оженив. И оддав лист.

Узяв той хлопец лист за пазуху и понѣс до зятя. Зять прочитав его а там Марко пише: „Звѣнчати его в першу недѣлю“.

От дождали недѣлѣ, повели у церков, звѣнчали, посвадьбовали и одписуе зять богатому Маркови:

„Все зробили так, як тобѣ хотѣлося. И повѣнчали и посвадьбовали.“

Як прочитав богатый Марко лист, онѣ за голову вхопився.

— Я писав, думаете собѣ, обы его собаками стровити, а он его повѣнчав. Поѣду я сам до нього, може ще що учиню.

Поѣхав до зятя и звѣдае:

— Что се ты наробив?

— Звѣнчав — каже той.

— На чтож ты его звѣнчав, як тобѣ писав, обы ты его собаками стровив.

— Як написано было так я и зробив. Я покажу тобѣ твой лист.

Покажи!

От, пошли они глядати того листа, а собаки вскочили в хату и розорвали богатого Марка. А той хлопец живе и володѣе цѣлым маетком богатого Марка.

Така то Божя воля!

STÁTNÍ TISKÁRNA V UŽHORODĚ 1922—1501.